



Ucapan Selamat Hari Raya  
dari Abu al-Mokhtar dan lajnahnya

Ruangan Abu al-Mokhtar dan lajnahnya mengucapkan selamat hari raya, *min al-'Aidīn al-Fā'i'zīn*

*al-Maqbūlīn* kepada penggemar-penggemarnya dengan menuntut ampun dan maaf kepada penanya-penanya yang tidak sempat dijawab pertanyaannya ataupun kerana masalahnya telah berjawab di dalam ruangan ini.

Abu al-Mokhtar dan lajnahnya berharap kepada penggemar-penggemarnya supaya mendatangkan masalah-masalah yang mengenai hal-hal yang berlaku di sekelilng kita hari-hari – yang terjadi dan yang dimusyikikan. Juga Abu al-Mokhtar dan lajnahnya berharap bahawa pengertian-pengertian yang dibawanya lebih mengutamakan dalam hukum-hukum yang muktamad dan ia tidaklah berasa terkesan apa-apa jika ada setengah-setengahnya menuduh dengan berbagai-bagai tuduhan atas pendapatnya kerana ini adalah perkara biasa.

Marilah kita berdoa semoga Tuhan memberi pertunjuk dan hidayahnya kepada kita bersama – *Āmīn*.

#### Kahwin Tidak Kufu

Idrus Muhammad, Parit Raja, Batu Pahat, bertanya:

Sebagaimana berita akhbar bahawa seorang Islam kebanyakan telah berkahwin ke lain daerah dengan seorang Sharifah dan apakala balik ke daerah itu maka kadi telah menghukumkan supaya perkahwinannya di-fasakh – jadi kahwin yang telah disetujui dan dengan kemahanan kedua orang tuanya telah tidak sah. Bagaimanakah hukumnya yang sebenar dalam perkara ini?

Jawab: Perkara ini sebenarnya telah dijawab di dalam

Qalam beberapa lama dahulu dengan membawa beberapa alasan-alasan yang tepat di dalamnya. Kerana masalah ini timbul semula maka kita jawab sahaja masalah ini dengan serba ringkas. Jika saudara mahu alasan-alasan yang lebih luas carilah di dalam majalah Qalam di dalam ruangan ini empat tahun dahulu.

Ringkasnya, ialah: Seorang wali, sekalipun

wali mujbir apabila hendak mengkahwinkan anaknya hendaklah ada dengan izinnya – yang ertiya izin anak itu lebih utama dan jika anak tidak reda maka jika ia mengadu wajib diceraikan. Hal ini berlaku pada masa Rasulullah (SAW). Dengan ini terang bahawa seseorang perempuan gadis atau janda adalah berhak mengkahwinkan dirinya dengan siapa pun yang disukainya tetapi semoleknya carilah rai ayah dan bonda kerana ayah dan bonda itu lazimnya berupaya mencari pasangan mereka yang bakal boleh mengira-ngira keselamatan mereka pada masa yang akan datang sama ada memandang kepada keturunan atau pun kelakuan dan adab tertibnya. Wali, hanyalah sebagai pengawal yang boleh memberi syor dengan sebab-sebab yang mengenai keselamatannya pada masa yang akan datang.

Tetapi tentang adakah Sharifah tidak kufu dengan

orang-orang ‘Ajam dan menyebabkan tidak boleh kahwin, ini adalah menunjukkan akan adanya kasta-kasta sedang kasta-kasta itu adalah dihancurkan oleh agama Islam semenjak dari zaman Rasulullah (SAW) hingga kepada zaman sahabat dan tabi‘in serta seterusnya. Dalam zaman Rasulullah orang Quraisy pernah berkahwin dengan orang Habsyi sedang mereka berasal daripada hamba yang dibebaskan. Kerana adanya kejadian-kejadian itu dan dengan adanya hadis yang menyatakan tidak ada kelebihan di antara orang ‘Ajam dengan orang Arab hanya kerana takwanya (baktinya) maka tidak ada alasan sama sekali, mengikut hukum yang berpegang kepada Quran dan hadis, untuk membatalkan perkahwinan itu terutamanya pula di dalam perkara ini tidak ada paksaan. Ayat-ayat dan hadis-hadis mengenai ini telah pernah disiarkan di dalam majalah ini dan kerana itu tidak payah kami ulang semula dalam hal ini!

\* \* \*

#### Talak Tiga Satu Lafaz

Sayyid Abdul Hamid Muhammad, Sungai Ara, Pulau

Pinang bertanya:

Seorang kenalan saya, yang belum sekalipun pernah bercerai dengan isterinya yang telah hidup bersama-sama semenjak sepuluh tahun lebih, telah baru-baru ini di dalam kebebalan dan kemarahan menceraikan isteri dengan sebegini “Aku cerai hang dengan talak tiga” dengan satu lafaz. Setelah itu kedua-duanya bersama-sama menyesal dan hendak merujuk kembali. Tuan kadi telah memberi ulasan yang muktamad bahawa talak ketiga-tiganya telah gugur walaupun isteri itu dalam mengandung dan

lafaz tiga itu dalam satu lafaz. Jadi tuan kadi memberi penerangan yang lebih lanjut iaitu tidak ada jalan yang boleh mengembalikan keduanya bersama hidup semula melainkan secara “cina buta” dan mestilah si lelaki mengeluarkan wang sebanyak \$120 untuk bayaran kepada “jantan yang bercina buta” dan dari kerana lelaki yang bersangkutan di dalam perkara ini hanya sanya seorang peon di sekolah cina yang bergaji sebanyak \$65 sebulan maka tidak ia upaya mengumpulkan wang sebeginu banyak bahkan pencarian ini tidak pun mencukupi untuk penghidupan dengan anak lima yang sedang bersekolah dan kecil. Diharap tuan jelaskan perkara ini!

1. Adakah talak itu mengikut bilangan di dalam lafaz yang satu.
2. Apakah sebenarnya cina buta ini perkara yang diluluskan Islam?
3. Apakah hukumnya mereka yang telah mengambil isteri-isteri mereka selepas talak yang ketiga menerusi cina buta?

Jawab: Masalah ini bukanlah masalah baru diperbahaskan. Banyak pendapat-pendapat telah diberi dalam hal ini sehingga timbul di dalamnya empat firqah:

1. Talak tiga dengan satu lafaz hukumnya *bid'ah muharramah*, dan tiap-tiap bidaah di dalam agama itu tertolak, tidak sah. Karangan-karangan yang dibawa mereka ialah Ahadis Sahih Bukhārī dan Muslim serta Aḥmad dari ‘Ā’ishah yang berkata (maksudnya) “Bahawa Nabi (SAW) yang pernah berkata: Barang siapa berbuat perbuatan yang tidak sama dengan perbuatan kami, maka hal itu

(bersambung ke muka 38)

(sambungan dari muka 8)

tertolak”

Berpegang kepada hadis ini mereka memandang bahawa talak itu tidak menjadi tiga atau satu – ia memandang hanya talak itu tidak sah semata-mata.

2. Talak tiga itu apabila dijatuhkan kepada isterinya yang telah dicampurinya hanya menjadi satu talak sahaja tetapi kepada isteri yang belum dicampurinya maka talak itu menjadi tetap tiga talak.

Alasan mereka daripada satu hadis riwayat Ahmad daripada perkataan Abū al-Šuhba’ kepada Ibnu ‘Abbās yang menunjukkan bahawa tiga talak dalam satu lafaz itu ditetapkan Rasulullah (SAW) hanya satu talak sahaja, begitulah masa khalifah Abu Bakar dan masa Umar tetapi kemudian ‘Umar menjadikan hukuman itu tiga talak kepada perempuan yang belum dicampuri.

3. Tiga talak satu lafaz yang dilafazkan oleh seorang suami kepada isterinya sama ada yang bercampur atau pun tidak – tetap menjadi tiga talak. Dengan membawa beberapa keterangan hadis – yang di antaranya ada pula didapati sanadnya tidak bersih (kerana kekurangan tempat hadis-hadis ini tidak kita bawa di sini).

4. Ketiga-tiga firqah yang tersebut di atas dibantah oleh firqah ini dengan menyatakan bahawa semuanya keterangan mereka tidak boleh dibuat dalil kerana tidak begitu kuat lebih-lebih lagi ada pula berlawanan dengan firman Allah dan dengan hadis-hadis sahih yang menunjukkan bahawa talak tiga dengan satu lafaz itu tidak terhitung tiga tetapi hanya satu. Ia berdalil dengan firman Allah dalam surah al-Baqarah ayat 229. Ayat ini dapat menerangkan cara talak yang berturut-turut sehingga tiga kali jadi

pemutus – tidak sekali dalam satu lafaz terus.

Firqah ini membawa beberapa hadis lagi menerangkan bahawa pada zaman Nabi Rasulullah menjadikan satu talak sahaja walaupun diucapkan seribu talak. Rasulullah sangat marah kepada orang-orang yang melafazkan talak tiga pada sekali itu.

Dengan ringkasnya dapatlah kami sebut menurut sejarahnya bahawa lafaz talak sekali sebut tiga atau lebih itu dipandang satu sahaja pada zaman Rasulullah, zaman khalifah Abu Bakar dan zaman khalifah ‘Umar dalam dua tahun memerintah tetapi sesudah itu, kerana banyak orang yang mempermain-mainkan lafaz itu, Sayidina ‘Umar hukumkan ia jadi tiga talak.

Jadi satu soalan timbul: Apakah hukum-hukum yang berlaku pada zaman Rasulullah dan diteruskan oleh khalifah Abū Bakar dan kemudiannya, satu masa oleh khalifah ‘Umar boleh diubah kerana berubah keadaan?

Sayidina ‘Umar kemudiannya melakukan lafaz tiga talak jadi tiga adalah menunjukkan supaya orang-orang jangan mempermain-mainkan talak supaya menjadi peringatan kepada yang lain-lain ini. Ini ijтиhad beliau.

Tetapi orang-orang yang insaf tidak menyertai ijтиhad Sayidina ‘Umar tetapi mereka menjalankan fatwa Nabi (SAW). Oleh itu Sayidina ‘Alī ibn Abī Ṭālib, Ibn Mas‘ud, Ibnu ‘Abbas *raḍiyya Llāh ‘anhu* berfatwa sebagaimana yang difatwakan oleh Nabi (SAW). Fatwa ini diikuti beberapa sahabat lagi dan banyak ulama *tabi‘īn, tabi‘ al- tabi‘īn*.

Pendapat kita dalam hal ini, daripada keterangan-keterangan yang kita periksa yang terpakai ialah lafaz tiga atau lebih dalam satu lafaz hukumnya satu talak sahaja kerana

cara-cara talak itu ditunjukkan oleh Allah “Dua kali, sesudah itu, hendaklah kamu rujuk dengan cara yang sopan, atau lepaskan dengan (talak ketiga) dengan cara yang baik seperti yang tersebut di dalam surah al-Baqarah ayat 229 itu.

Berkenaan cina buta maka hal ini, sebagaimana pernah kami terangkan bahawa hukum ber-cina buta (berkahwin dengan wanita dan setelah bersatu di niatkan ceraikan dengan tiga talak) adalah dilaknat oleh Allah dan Rasul Allah (SAW) seperti yang disebut oleh hadis sahih riwayat Aḥmad dan Nasā'i (maksudnya):

“Mahukah aku khabarkan kamu kambing pinjaman?” Jawab sahabat-sahabat: Muah ya Rasulullah.

Kata Rasulullah (SAW): Ialah *muhlil* (cina buta-P). Allah memberi lakanat, kepada *muhlil* dan orang yang *muhlil* halalkan.

Sayidina ‘Umar pernah mengatakan: Kalau orang bawa ke hadapanku akan *muhlil* dan orang yang *muhlil* haramkan

Demikian ini pula pendapat ‘AbduLlah ibn ‘Umar dan nescaya aku hukum (aku pandang) ia berzina. Sahabat-sabahat Nabi yang lain yang memandang nikah *muhlil* itu tidak sah, dan *muhlil* serta suami isteri itu dapat lakanat.

akan merosakkan kesihatan saya dan membawa penyakit saya lebih-lebih parah lagi. Dengan sebab itu saya bertanya kepada lebai di kampung, mereka menyatakan saya tidak wajib berpuasa tetapi hendaklah membayar fidyah. Bagaimana cara fidyah yang saya mesti bayar itu?

Jawab: Saudara tentu telah mengetahui hukum-hukum siapa yang diluluskan tidak berpuasa seperti perempuan hamil, perempuan menyusukan anak, orang yang sangat tua, orang yang sakit dan lain-lain lagi.

Kepada orang-orang ini tidak dipertanggungkan puasa tetapi hendaklah ia membayar fidyah dengan memberi makan kepada orang-orang miskin seperti yang disebutkan oleh hadis daripada Ibnu ‘Abbās yang menyatakan bahawa tiap-tiap sehari puasa yang ditinggalkan itu hendaklah memberi makan kepada orang miskin.

Makanan yang diberikan itu tidak ditentukan oleh agama sama ada yang sudah dimasak atau belum tetapi adalah lebih dianjurkan kadar mencukupi makannya sehari. Boleh diberi yang di masak (kepada orang miskin yang tidak berumah) atau yang belum dimasak (kepada orang miskin yang ada rumah). Boleh pula diberi tiap-tiap hari atau pun dikumpulkan sekali dengan memberi makanan kepada beberapa orang miskin untuk beberapa hari.

\*       \*       \*

### Fidyah Puasa

Yusuf Ahmad, Sungai Buluh, Melaka, bertanya:  
Saya adalah seorang yang mengidap penyakit lemah sendi dan saya telah mencuba berpuasa pada awal puasa, tetapi saya tidak larat dan doktor menegah saya berpuasa dengan menyatakan jika teruskan harus

Selamat Hari Raya  
M. N. Abdul Hamid,  
327, Batu Road, Kuala Lumpur.  
Wakil menjual majalah-majalah Qalam, aneka warna dan buku-buku keluaran Qalam daerah Selangor, menjual berbagai-bagai majalah dan buku-buku keluaran Semenanjung Tanah Melayu.